

Ko enei piira e wha i unuhia mo te taha ki nga kai-piira ; ko te Nama 102 na Te Wharepouri te Amo i unu mo te taha ki tona whaea ki a Puru Rawinia i te 1 o nga ra o Pepuere, 1907 ; me te Nama 103 me 113, no te 4 o Pepuere, 1907 ; me te Nama 116 no te 4 o Pepuere, 1907, i unuhia ai ; a i te mea kaore he kai-whakahe, no reira matou ka tohutohu penei atu ko enei piira e wha me whakakore atu.

*Piira Nama 105 me 106.*—A Te Whenuanui me etahi atu.

*Piira Nama 107.*—A Mahaki Tapiki me etahi atu.

*Piira Nama 109.*—A Hori Wharerangi me etahi atu.

*Piira Nama 110.*—A Mapu (te Pukeiotu) me etahi atu.

*Piira Nama 111.*—A Erueti Tamaikoha me etahi atu.

*Piira Nama 112.*—A Te Iriwhiro te Wiremu me etahi atu.

Ko enei piira e whitu he tono whakanuku hea, a ko aua hea whakanuku e tonongia nei i raro i ia o aua keehi he mea korerorero he mea whakariterite e nga tangata nona te whenua, i waenganui i a ratou, a whakaaetia ana e ratou i te aroaro o tenei Komihana, kaore kau he kai-whakahe, no reira kua mahia a kua tapiritia atu e matou ki te whairu o Ruatahuna Poraka he rarangi e whakaatu ana i nga ingoa o aua tangata, hui katoa kotahi rau e waru tekau, me nga hea whakanuku i whakaaetia mo ratou ; a ka tohutohu atu nei matou me whakapumau tena whakanukuhanga i o ratou hea.

A i raro i tetahi wahi o te piira Nama 107 i tonoa kia whakaurua etahi ingoa tangata hou e rima ki te ota, kaore he whakahe i puta mo te whakauruhanga atu o enei tangata ; no reira kua apitiria atu e matou o ratou ingoa e rima, timata i te Nama 885 tae noa ki te Nama 889, me nga hea mo ia tangata o ratou, ki te rarangi e tapiri nei ki te whairu ; a me ta matou tohutohu atu me whakauru atu aua ingoa me aua hea ki te ota.

*Piira Nama 108.*—A Te Rahui Hoera. He whakauru i te ingoa o Rere Rahui, f., e ono tau, kia rima nga hea mona ; a i te mea kaore he kai-whakahe, kua apititia atu e matou taua ingoa, Nama 890, ki te rarangi e tapiri nei ki te whairu ; a me ta matou tohutohu atu me whakauru atu taua ingoa ki te ota mo taua rima hea i tonoa mai nei.

*Piira Nama 114.*—A Puihi Marutawhao me etahi atu. He whakauru i nga ingoa o etahi tangata hou e wha tekau ma iwa mo te wahi o Ruatahuna Poraka e karangatia nei ko Te Waiiti ; a i whakaaetia tenei tono e nga tangata nona te whenua ; no reira kua apitiria atu e matou aua ingoa 49, timata i te Nama 891 tae noa ki te 939, ki te rarangi e tapiri nei ki te whairu, me nga hea mo ratou e whakaatu ana i roto, hei whakauruhanga atu ki taua puihi ki Te Waiiti nei anake ; a me ta matou tohutohu atu me uru ratou ki reira.

*Piira Nama 104.*—A Te Rauna Pakaha me etahi atu. He whakauru i etahi tangata hou e rua tekau ma whitu, mo tera wahi o Ruatahuna Poraka e karangatia nei ko Whakahau, mo nga hea e mau na i roto i to ratou rarangi ingoa i tukua mai nei e aua kai-piira ki te aroaro o tenei Komihana.

I whakaarahia ano tenei kereme e Te Rauna Pakaha i te aroaro o te Komihana tuatahi, a i whakahengia hoki i reira e Te Kauru te Kanapu. Ka mutu te whakahaere a taua Komihana i taua keehi ka puta ta ratou whakatau (Pukapuka 6, wharangi 262) kia uru ko nga upoko whanau toko-ono—i kowhiria i roto i enei tangata—ki taua whenua, kia kotahi te hea mo ia tangata kotahi o ratou. Otira ko nga ingoa o Te Rauna Pakaha me ona hoa kaore i roto i te ota ; a kaore hoki e taea e matou te mohio he aha ranei te take i mahue ai ratou ki waho.

Kua whiriwhiria e matou tenei keehi, a kua kite iho matou ko nga korero a Te Whenuanui, a Hori Wharerangi, me Paitini Tapeka, i korerotia i te aroaro o te Komihana tuatahi (Pukapuka 6, wharangi 161), e tautoko ana i tenei kereme. Ki ta matou whakaaro ko te kereme mo enei tangata e rua tekau ma whitu e tika ana kia whakaaetia, me o ratou ingoa me o ratou hea me whakauru atu ki te ota mo taua wahi anake o Ruatahuna Poraka e karangatia nei ko Whakahau. No reira kua apititia atu e matou o ratou ingoa me o ratou hea, timata atu i te Nama 940 tae noa ki te 966, ki te rarangi e tapiri nei ki te whairu ; a ka tohutohu atu nei matou me uru atu ratou ki te ota, mo taua puihi anake, ara mo Whakahau.

*Piira Nama 115.*—A Mehaka Tokopounamu me etahi atu. He whakauru i etahi ingoa tangata hou kotahi tekau ki te ota mo tenei whenua. I whakaarahia ano tenei keehi i te wa o te Komihana tuatahi ; whakahaeretia ana e taua Komihana ; a whakakorea ana taua kereme.

Kua ata whiriwhiria e matou tenei keehi i runga i tona tukunga mai ki o matou aroaro, hui atu hoki ki nga korero a nga kai-korero tautoko i taua kereme nei ano i te wa o te Komihana tuatahi ; a kite iho ana matou he take hou ta ratou e whakaara mai nei i naianei—ara he take tupuna—hei apiti atu ki ta ratou take tuku i whakaarahia anaketia nei e ratou i te whakawakanga tuatahi. Kaore rawa e taea e matou te mohio—mehemea ra he tika te take tupuna o Ngati Tawhaki e hapainga mai nei e ratou i naianei—he aha te take i mana ai te tuku a Tuiringa, o Ngai te Riu nei, i tenei whenua ki a ratou (kia Ngati Tawhaki) i te mea he whenua tupuna tenei no ratou ake ano. Tetahi hoki, ko a ratou korero i te aroaro o tenei Komihana karrui te tino rereke noa atu i a ratou korero i te aroaro o te Komihana tuatahi. I ki hoki ratou i reira ko tenei whenua he mea tuku na Tuiringa ki a Te Puehu, me Ruru, me Ngati Tawhaki, hei utu mo te ngakinga i te mate o Ngai te Riu i Kauae, i te hinganga i a ratou (i a Ngati Tawhaki) o Ngati Whare ki Arikirau ; a i tenei Komihana e ki ana ratou he mea tuku na Tuiringa ki a Te Puehu me Ngati Tawhaki hei utu mo nga toto o Ngati Tawhaki i mate ki Mangatepa i te whawhai mo te wahine a Ruru.